

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 359 del 14/02/2026

Manà fora su Trentino Tv l program l vegn endrezà dal Comun General de Fascia

“Pedies”: en sabeda ai 14 de firé vegn fora la puntata #525 del program ladin per la television

[Ladino] Ence chesta setemèna l é a la leta l nef appuntament de “Pedies”, rotocalch ladin de informazion, ruà a la puntata n. 525. I argomenc de chesta puntata l é la performance teatrèla dedichèda al prof. Vigilio Iori rechia, l concert “olimpich” del Grop ladin “GANES” fat dut da eles, la rubrica “Svampol Ciatarul” con protagonist l joen Mattia Valentini – Soriccia.

A pech più che 3 egn da la departida del prof. Vigilio Iori, la Union di Ladins de Fascia e la Scola Ladina à volù l recordèr co la publicazion de “L Picol Prinz” e na performance teatrèla tutta fora dal medemo test. Se à creà n’atmosfera de gran pascion e sentiment te scola dintorn l recort de Vigilio Iori olache amisc, dozenc, compagnes de letradura, teater e auter i se à troà per l recordèr. A el ge è stat dedicà l codejel del Picol Prinz traslatà per ladin fascian da Stefen Dellantonio Monech, n test l è stat dit che l lo raprejentea sot desvalives aspec, sibie dal pont de veduda uman che cultural.

Anter i evenc dintornvia la olimpiades te Fiem, l é stat metù a jir ence l concert del grop Ganes de la Val Badia a Tieser. Per l’ocajion l é stat prejentà so nef album dal titol VIVES! Na regoeta de cianties e musiches che vel esser na lauda a la vita, fata de legrezza, forza, stories de n’outa e tradizions. Recordon che la ciantarines de chest grop les é nasciudes e cresciudes te Badia e enceben che les vegn chiamèdes a portèr dant sia musica dutintorn, a livel internazionèl, les é n muie leèdes a sia cèsa e sia valèda. Sia cianties les tol ispirazion da so ambient, da sia tradizions, les conta de sia jent, de stories passèdes, ence co na pizèda de encresciujum.

Per la rubrica “Svampol ciatarul: jent che fèsc jerveèr sie cunst”: instouta porton dant l joen Mattia Valentini de Soriccia che l ne conta de so percors fat con gaissa e neva adventures tel ciamp de la radio e del podcast. Mattia l é n jon da Cianacei, l studia enjegeria a Trent e l se dèsc ju ja da vèlch an co la comunicazion per chela che l à na gran pascion. Te so percors l à jà metù a jir desvaliva trasmiscions desche interjoegn, waypoint. L à colaborà e l colaborea ence amò ades con n muie de radio locales desche Radio Record, Radio Gherdena, Radio più de Agort, Radio Cortina e autra amò. Ades l fèsc ence l speaker ofozièl de manifestazions sportives. N joen con jà na cariera enteressanta e n muie de enteresc.

I reports de chesta setemèna i é stac enjigné e porté dant da Angela Pederiva e Riccardo Zanon.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN**- vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun **AltoAdige TV – canal 11 de BZ** - vigni domenia da les 18.00 (sie da sera).

Se pel veder duta la puntates enche sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina

<https://www.facebook.com/TelevijionLadina>

Traduzion di Servijes Linguistics e Culturèi del Comun general de Fascia

(cdt)